

In Eedi'in Ta'nin Paul-di Timothy Ônta'nannin

¹ Naa Paul-á Jesus Christ-ví t'ôekhuwa'i-ân omuu, Yôesi Tádá natsónpóedí kí'bi' omúní'in, hedânho t'owa dovâyt'ôe'âamídí Yôesi Tádá iví tuu imăgi'in to'wên Christ Jesus-ví'piye' dívíwhăyunde'indáho in wówátsi nahánde pí'in ovâymăáni. ² Ná'in ta'nin naadi u Timothy wínta'do', u-á naví ay waag-ibá wíchaa hedí wíséegí. Yôesi na'inbí Tádá-ádi hedá Na'inbí Sedó Jesus Christ-ádi séegísehkană wóemăáni, hedá uví'piye' nasehkanăpúwí, hedá wóekhăge'namí ánsshaagin pídíbo' unchă'nídí.

Timothy-ví'gedi Paul i'ánshaamáadi Yôesi Tádá óeku'daa'o'

³ Naa Yôesi Tádá dókú'daa'o', i-á namuu iví t'ôe dônkanmăa'i', hedí dínhanginná pín ta'ge haydi kin dáy'o'in, naví thehtáy pahpá'in díví'an waabá. I dókú'daa'o' u' unmuudi, khuu-á thaa-á ugí' dáy'yúusu'odi. ⁴ Naa hânho oda' wiyá wímúní'in hedânho ohíhchanpúwídí, uví'gedi báyékí ánskaa dínpóya'di háa bisíhtăă'in ânwiye ihaydi. ⁵ Hedí dáy'ánshaa'o' háa Jesus-ví'piye' ta'gendi biwhăyunde'in. Páadé uví sa'yâa Lois hedáhá' uví yiyá Eunice-á inbí pí'nă khó'yé-á dănhwăyu, hedá naa dínhanginná u-á wá' hanbá biwhăyunde'.

Paul-di Timothy óetu'an Yôesiví tuu t'owa híwó' ovâyt'ôe'amídí

6 Hedânkun u wí'ánshaakannamí, naa uví p'ó'ḍé dáymank'û' ihayḍi Yôesi Tádádí wí hääwí wóeyôn mân'amídí. Nää wíyá bipimääni hæ'i t'ôe híwó' mân'âamídí, páadé ihayḍi bitsiye'o waagibá. 7 Yôesi Tádádí na'in khuwôeda' wíḍímägipi na'inbí pí'nä khó'yé, hewänbo kay-áho dímä', hedá díkhäge'do t'owa âyséegímá've-ídí, hedá hangintandá dímä' na'inbí wówátsi híwó' âyhúuwídí.

8 Hedího wí'unwôeda'ípi Nanbí Sedó Jesus-ví'gedi t'owa ovâyt'ôe'amídí, hedá wíḍíwôeda'ípi tobá iví t'ôe dôn'odibo dípansóge wänbo', hewänbo shánkídí naa t'ôephade iwe o'ân waagibá un wá' unkhâymuní mänt'ôephadé-ídí Yôesi Tádáví híwó'di tuu t'owa ovâyt'ôe'amídí, hedí Yôesi Tádádáho kay wóemääni kin bi'amídí. 9 Idânkunho na'in dîn'aywon hedá iví'inda' gimúnídí dítukánnan. Hedí kin i'an wên háawên iví'annin namuudida' bá yoe, hewänbo báyéki séegisehkanä imáadân. Hân'oebo wa' hääwí nakhí'yenpídibo wí'bo i'ánshaamägi kin i'amídí, Christ Jesus-di dínkhâymaa'in namuudi. 10 Hedí nääho Yôesi Tádádí ná'i séegisehkanä na'in dínkeeyan Christ Jesus-á napówá ihayḍi dîn'aywoenídí. Christ-dáho in chuwa namuu'in na'inbí'wedá dînyâ'an, hedá handíḍá dínkeekw'ódi hádídí Yôesi Tádáví híwó'di tuu âywhâyundedi ná'in wówátsi nahándepí'in âykéyídí.

11 Hedí Yôesi Tádádáho naa dísóge t'ôekhuwa'i-á hedá háhkandi-á omúnídí, iví híwó'di tuu únmuu i'gedi t'owa dovâyt'ôe'âamídí. 12 Hedí ná'i t'ôe dáy'o'i namuudi naa t'ôephade iwe nää o'ân.

Hewänbo tobáháa kin dînpó' wänbo wó'wôeda'pí, dînhanginnândi to'wíwí'piye' naa dáýwhäyunde'in, hedá híwó'dá dînhanginná i-á ûnkoedi'in i háäwí iví mange dônyoe'andi' dîn'áyîngi'amídí i t'ä'gi thaa napówá píhay. ¹³ Naadi wînthayyan háawin in ta'gen háhkan namuu'in, hediho ʘ-á úkhây'ä' ná'in háhkan diwebá bitsaakêeni'in. Hedi kin bi'odi in whäy-á in séegi-á Christ Jesus napäyi'i nâahûuwí. ¹⁴ Ná'i híwó'di háäwí Yôesi Tádádí uvi mange wônyoe'andi' män'áyîngihûuwí. I Yä'dâa'i P'oewaahâa na'inbí pí'ná khó'yé gínthaa'idáho wóekhäge'nami kin bi'amídí.

Wáy wêndi Paul óeyoe'an hewänbo Onesiphorus-dáyo

¹⁵ Úhanginná t'ähkí in Asia nangewin t'owadi naa díyoe'an, Phygelus-ádi Hermogenes-ádi indi wänbo díyoe'an. ¹⁶ Na'inbí Sedóví'piye' dáyyûusu'o' in Onesiphorus-ví k'aygi'inbí'piye' nasehkanäpúwídí, idá naa háyännanho díbo'aawówá'an, hedá tobá náä pan tewhá ee owhi'ân wänbo wídíwôeda'pí. ¹⁷ Nawôeda'íwí'wedí náä Rome-piye' na'ää, hedi napówá ihaydá ihe'yidibo naa dítuwämáa díshaa píhay. ¹⁸ Naa dáyyûusu'o' owáy i t'ä'gi thaa napówá ihaydi Na'inbí Sedó iví'piye' nasehkanäpúwí. Ubo híwó' úhanginná, oe Ephesus búu'ú iwe i-ádi naa-ádi gayi' ihaydi idi báyéki díkhäge'nannin.

2

Timothy ûnkhây'ä' híwó' Yôesigí' it'ôe'amí'in

¹ Navi ay, Christ Jesus-di iví séegi-sehkanä ûnmuu'in dímägi, hedi ná'indibá wóekay'amí.

2 I hääwí naadi báyéki t'owa dovâyhá'andi' unt'oe, hedi náä ná'i unt'oe'ibá wây-á t'owa ovâyháhphadé-í, indá dínkhây'ä' häädi wänbo t'ähki háa dínwó'nân waa dívíkanhúuwí'indá dimúni'in, hedáhá' indá wá' dínkoedí-í wé'ge'in t'owa-á ovâyhá'amídí.

3 U-á wí sundado Jesus Christ-ví' waagi'ba unmuu, hediho naa dont'ôephadende waagibá u wá' úkhây'ä' unkhây'múni'in igí' mänt'ôephadé-í. 4 Wí sundado namuu'i-á wa'di háa óeyôn waa i'odibo há'to iwedi iyâa'amí i'amídí háa in sundado dimuupi'in díví'o waagibá, gá iví p'ó'dédí' ihíhchannamí'in nada'dân. 5 Hedá to'wí i'ádâamáa'i-á háa ûnkhây'ä' waa i'ádâa'opídá há'to hääwí in dit'anpo'in ovâymä'i' óemääni. 6 Hedá wí to'wí nava iwe báyéki it'ôe'andi-á ûnkhây'ä' i páadé'i namúni'in i hääwí napaa iwedi ihónídí. 7 Híwó' bi'ánshaa'amí ná'i wítumáa i'gedi, hedânho Na'inbí Sedódí híwó'di ka'powa wóemääni hääwí t'ähki útáy'i' unka'pówa-í. 8 Jesus Christ-ví'gedi bi'ánshaa'amí. I-á nachuu wänbo nawáywówápóe, i-á David-ví ây iwedi'ibá namuu. Ná'i-ân namuu i híwó'di tuu iví'gedi t'owa dovâyt'ôe'o'. 9 Ná'i tuubá namuudi t'ôephade iwe o'ân, hedi wí yanäkíkandi waagibá náä pan tewhá iwe owhi'ân, hewänbo Yôesi Tádáví tuu-á ûnkaydi wí'ûnwhimuupí. 10 Tobá háa naa dînpó' wänbo dáyyä'ä'o' in Yôesi Tádádí ovâyde'mannin dimuu'in dovâykhäge'namídí hedânho in wá' Christ Jesus-di ovây'aywoenídí, hediho hânhay wänbo t'ähki sa'wó'dá' naná' diwe ditháa-í. 11 Ná'i hí' náä otúni'i-á ta'genda' namuu:

Christ-ádí gichuudá i-ádí**á** wáy naʼán diwebá giwówákwoʼní. ¹² Ívít'ôephadeyääʼandáhoʼ, i-ádí wéʼge gitsonyëení. Hewänbo i wíʼâytaapí gin gitúdáhoʼ, i wáʼ natúní naʼin wänbo-á widítaapíʼin. ¹³ Tobáháa naʼin háa gínkhâyʼäʼ waa wíʼívíʼanpí wänboʼ, i-áho háädi wänbo t'ähki háa ûnkhâyʼäʼ waa iʼoʼ, gá wíʼûnkoedipídân iʼegóʼamídí iví híʼ natúʼin.

Timothy in taʼgen namuuʼin ihûuwíʼin ûnkhâyʼäʼ, hedi in taʼgen namuupíʼindá iyoeʼamí

¹⁴ U-á úkhâyʼäʼ in méesateʼin t'owa náʼi háäwí wítuʼan níʼgedí ovâyʼánshaakannamíʼin, hedá Yôesi Tádáví páadépiyeʼ kayʼindidá ovâytuʼâamí tuu iʼgedidaʼ wídívítuhánmáʼve-ípi. Han dívítuhkanmáadáhoʼ wídínchäʼmuupí, hedi in toʼwên dívít'óyandeʼinbí ánskaa-á ovâywänpipedeoʼ. ¹⁵ Háädi wänbo uví t'ôe áyîngidí mánʼâamí hedânho Yôesi Tádá natúnídí híwóʼ bíʼannin, hedá háa bíʼoʼin namuudi wíʼunwôedaʼípi, hedá Yôesi Tádáví taʼgen tuu ûnmuuʼi t'owa taʼge ovây t'ôeʼâamí. ¹⁶ In t'owa Yôesi dâyaʼaʼginpí waa dívíhéeʼoʼinbíʼwedi hedá toʼwên inbí híʼ dínchäʼmuupíʼinbíʼwedi biyâaʼamí. Haʼwâaʼi híʼdí t'owa Yôesivíʼwedi shánki ovây yâaʼoʼ. ¹⁷ Wí phée nawówaʼpíʼ nawadedíʼdá i khowa óháʼdãndo waagibá, náʼin t'owaví híʼ-áho t'âmäpiyeʼ dínwadedíʼ, hedi handidi t'owa ovây háʼdãndoʼ. Hymenaeus-ádí Philetus-ádí wên wíye senáʼ damuu in haʼwâa dívíhéeʼoʼin diwedi. ¹⁸ Indáho in taʼgen namuuʼin diwedi dányâaʼan. Kinnân datûʼ: Christ-víʼpiyeʼ ívíwähäyü ihaydiho giwáywówápóe waabá ho gínpóe,

hedihō owáy gichuu ihaydáho na'inbí túu'ú wígiwáywówápúwípí. Inbí tuuđihō báyéki t'owa inbí whäyu iwedi ovâyâyâakanhon. ¹⁹ Hewänbo Yôesi Tádávi tuu ünmuu'i-áho wên kay'in tepú na'ingí' dínk'ú' waagi'inbá namuu, hedi iví ta'nin diwe kinnân ûnta'muu:

Na'inbí Sedó-áho ûhanginná wé'in iví t'owa ünmuu'in.

Hedá kindá wá' nata'muu:

To'wên t'ähki ditú'nin Na'inbí Sedóvi'in dimuu'indáho dívít'aywó'kanwóyí'ní'in dínkhây'ä'.

²⁰ Wí kodit'owa namuu'iví tewhá ee wí sä'äwé ûnsaa óedodi háa kwä' ts'ä'idi napa'andi', hedi nä'i sä'äwé-áho i hääwí shánki híwó'di namuu'i' óesaa'igí' namuu. Hewänbo wá' wiyá sä'äwé-áho phédá nap'odá napa'andi' nasaa, hedi i-áho i wähphade híwó' namuupí' hääwí óesaa-igí'-á namuu. ²¹ Hääwí yä'dâapí' namuu'iví'wedi ivíyâa'andá, handidi i sä'äwé hääwí híwó'di óesandi waagi'ba gimúni, hedá Na'inbí Sedóvi'indáho ta'gendá gipúwí, hedi idiho wí t'ôe dímäni igí' iví'amídi, hangí' ívíkhây'odi, hedi nä'i t'ôe dímä'i-á híwó' íví'amí.

²² Nä'i híwó'pí' taachan wáy wên e'nûn dâymáa'iví'wedi óyâa'an. Shánkídi bikhää-i uvi wówátsi ta'ge mänhûuwídi, hedá Yôesiví'piye' biwhäyu'bé-ídi, hedá t'owa-á ovâyséegihûuwídi, hedá indáda tsaaginpidíbo-á untháa-ídi. Kin bí'andá in to'wên yä'dâa'in inbí pí'ná khó'yé dimuudi Yôesiví'piye' dívíyûusukanmáa'in waagi'inbá unmúni. ²³ T'owa ánshaapí'in dimuu'in hedá hääwí wänbo wíđinhanginnáhpí'in

dimuu'indá dívítuhkandodi wí'ovâyt'óyaanípí. Ha'wâa'i hí' dâypiyemáa'in dimuu'indá wí'ná táye dívíwänpit'ayyaa'o'. ²⁴ Hebo to'wên Na'inbí Sedógi' dívít'ôe'o'indá wídínkhây'ähpí t'aytuhkannin dimúni'in, hewänbo shánkídí t'ähki t'owa-ádi híwó'nin dimúni, hedá híwó'nin hähkannindá bo'atä'indá dimúni. ²⁵ Dínkhây'ä' in to'wên Yôesiví hí' ônséegi'opí'in ovâythayyamí'in piháa díví'o'in, hewänbo kin ovâythayyodi t'ayginpídíbo' ovâyhée'âamí, hedí ma'dânho Yôesi Tádádí ovâykhäge'namí inbí t'aywó'di dâyyoe'amídí, hedânho in ta'gen namuu'in dihâhpúwídí, ²⁶ hedí kindidáho inbí hangintan dâwáykéyí, hedá Penísendiví'wedáho dívíyá'amí. Idá wên phay ovâyk'û' waagibá i'andi iwe diwhêe, hedího iví pan waagi'inbá dipóedí háa natú waa ho díví'o'.

3

Háa napúwí'in i t'ä'gi thaa napowa'ä' ihaydi

¹ Naa oda' ná'in wítukankhâyamáa'in úhanginnáni'in: I t'ä'gi thaa napowa'ä' ihaydi báyéki kây'in napuwagít'ôe. ² T'owa-áho wí'bo dívípiséegikhâyamáa hedá inbí chä' ní'gedida' díví'ánshaakhâyamáa. Indá dívíyêngikhâyamáa, kw'áye-á dívípítegekhâyamáa, t'owa-á t'ämägi-á ovâytukankhâyamáa, inbí yiyá'indá tádá'indá wí'ovây'a'geenípí, kú'daa-á wídívímäänípí, Yôesiví hääwí-á wí'ôn'a'geenípí. ³ Inbí k'aygi'in wänbo wí'ovâyséegi-ípí, häädi wänbo t'ähki dívíyá'be-í'in didá'í, pi'wên t'owaví'gedá yanäki-á dihí'yêeni, háa diwänpichäa waagá dívíkhâyamáa, háa'wänbo

dimúní, hedá i híwó⁷di háäwí namuu⁷i-á dâyt'áy-í, ⁴ inbí k'ema⁷indá inbí maatu t'owa⁷indá ná⁷inbí hánmin dínmuu⁷inbí mangá ovâykáani, díví⁷ánshaa⁷anpídíbo háäwí t'ähkí dívíkhâymaa, dívípihúu-í, Yôesi Tádá dâyséegímá⁷ve-íví⁷wedí indá⁷bá dívípihíhchannamí⁷indá didá⁷í, ⁵ indáho Yôesiví⁷näpiye⁷ dimuu waabá dívíkanhúuwí, hewänbo háawin iví kay ûnmuu wänbo wídínhanginnání. Ha⁷wâ⁷in t'owaví⁷wedí biyâatää-í.

⁶ Wáy wên ha⁷wâ⁷in inbí hôeyó wóegé tewhá eeye dits'úya⁷, wáy kwiya⁷ ánshaapí⁷in dimuu⁷in dithaa eeye, kwiya⁷ báyéki t'aywó⁷di dâymaa⁷in hedá t'ämägí⁷ híwó⁷pí⁷ taachandi ovâykaygimáa⁷in, hedí ná⁷in kí⁷min kwiya⁷ in dihôeyó⁷indá dívísó⁷dinde⁷ inbí háhkan ovâywhäyu⁷amídí inbí⁷näpiye⁷ ovâyamá⁷ídí. ⁷ Ná⁷in kwiya⁷didá in hôeyó⁷in háhkannin ovây⁷t'óyandedí háädi wänbo t'ähkí wíyá shánkí dida⁷ diháhpúwí⁷in, hewänbo há⁷to in ta⁷gen namuu⁷in diháhpúwí. ⁸ Ha⁷min háhkannindá in ta⁷gen namuu⁷in dâyyoegi⁷o⁷, hán⁷oe Jannes-ádi Jambres-ádi Moses-ví hí⁷dänyoegi⁷an waabá. Ná⁷in háhkanninbí ánshaa yä⁷däapí⁷da⁷ dínmuudi inbí whäyu Yôesiví⁷piyeho wídínchá⁷muupí. ⁹ Hewänbo háa dívíkanhon waa há⁷to híwó⁷ dínpúwí. Iwebo nakeepúwí ánshaapí⁷in dimuu⁷in, in wiye sená⁷ Jannes-ádi Jambres-ádi dänpóe waagibá.

Timothy in ta⁷gen namuu⁷in ûnhanginnândi híwó⁷ ikanhúuwí

¹⁰ Hewänbo udá áyîngidi ho naa dímû⁷ háa dáykanhon waa, hedího úhanginná háäwí in t'owa

dovâyhá'ó'i', hedá háa naví wówátsi donhon waagidá, hedá háäwí ipiye' dáykhäãde'indá, hedá háa dáywhâyunde'indá, hedá háa dáybo'atá'ó'indá, hedá háa t'owa dovâyséegí'indá, hedá háa dáyyäã'ó'indá. ¹¹ Hedá dímu' háa t'owađi naví whâyü dînmuudi díyanákí'annindá, hedá háa indi dí't'ôephadekannannindá. I búu'ú Antioch-á Iconium-dá hedá Lystra-á eeye kin naa dînpóe. Hebo tobá díyanákí'an wänbo', Na'inbí Sedóđi ná'i háäwí t'ähkí iwedi dîn'aywon. ¹² Hedá to'wên t'ähkí dida'in inbí wówátsi dâyhûuwí'in Yôesi Tádá óehihchanmäänídí, in wá' Christ Jesus-ví'in dimuudibo ovâyyanákíkankhâymaa. ¹³ Heđi ná'in yä'dâapí'in t'owa dimuu'indá hedá in t'owa dâyhôeyóhá'ó'indáho shánkí p'ändíkí'inho dipuwagít'óe. Ná'indá wây-á t'owa-á in ta'gen namuu'in diwedá ovâyyâakankhâymaa, hedá in wá' in ta'gen namuu iwedi bá dívípiyâakankhâymaa.

¹⁴ Hewänbo u-á úhanginná to'wídí wóehá'annin. heđiho téegí t'aagi háa unháhpóe'in diwe hedá háa biwhâyunde'in diwá bitsaakêení. ¹⁵ Híyää'i unmuu ihayđi waabo ná'i ta'kan Yôesi Tádáví'wedi na'ää'i' úhanginná, heđi ná'i ta'kan namuu'idibá wóehá'ó' háa Christ Jesus-ví'piye' biwhâyundedi wôn'aywoení'in. ¹⁶ Háäwí t'ähkí Yôesi Tádáví ta'nin diwe nata'muu'i-á i Yä'dâa'i P'oewaahâavi'wedi na'äädidá' namuu, heđiho báyéki nachä'muu díkhäge'namídí in ta'gen namuu'in giháhpúwídí, hedá háa híwó'pí' íví'ó'in dînthayyamídá, hedá in ta'ge'in p'ôe namúní'in dînkeeyamídá, hedá háa i'ge ívihûuwí'in

díhá'amídá. 17 Hedího ná'in háhkan gihádího na'in Yôesi Tádágí' ívít'ôe'o'indáho háäwí t'ähki gíntáy'i' âymáa hedânho híwó' igí' ívít'ôe'amídí, hedí hangí' wiyá háäbo wígínte'dée-ípí.

4

1-2 Yôesi Tádáví páadépiye' hedá Na'inbí Sedó Jesus Christ-ví páadépiyá wítumáa kinnân bí'amídí: Yôesiví tuu t'owa ovâytuuphadé-í hedá háädi nanân wänbo unkhâymuní kin bí'amídí. Híwó'pí in t'owa díví'odá ovâythayyamí, hedí ovâytu'âamí ha'wáa wídíví'âamí'pí'in, hewänbo i híwó'dí namuu'ida' dívíkanhúuwí. Háädi waa kin ovâyhá'odi indádí bibo'atä'âamí. Ná'i kin wâytumáa gá Na'inbí Sedó Jesus-di t'ähki t'owa ovâykeekw'ôenídân háa híwó' háa híwó'pí díví'annin, in diwówayi'indá in ho dichuu'indádí, hedí kin ikhâymaa owáy nawáypówádí nap'ó'dédí'sogedee ihaydi. 3 Hedího náä úkhây'ä' Yôesi Tádáví tuu t'owa ovây't'ôe'âamí'in, gá wáy wí thaa naná' diwáho in t'owa in ta'gen háhkan namuu'in há'to dit'óyandá'í, hewänbo shánkídí báyéki hôeyó'in háhkannin ovâytuwäkhâymaa, hedí dívíwänpihíhchannamídí didá'í ná'in háhkannindi ovâytu'âamí'in háäwí dit'oeda'ida'. 4 Hedá in ta'gen namuu'in wídit'ôe-ípídí díví'oyephohtidíkhâymaa, hewänbo i hí' ta'gen namuupí' pehtsiye waagi'ba namuu'i' dit'ôe-ídí díví'oyephohkhuukhâymaa. 5 Hewänbo u-á úkhây'ä' ta'gedá' bí'ánshaa'amí'in, hedá mänt'ôephadendedá biyää'ämí, hedá t'ämäpiye' unyêení Yôesiví híwó'dí tuu in t'owa

ovâyt'ôe'âamídí, hedá in t'ôe Yôesidi wóeyônnin híwó'dá bikanhûuwí.

6 Nă'i hăăwí wítu'an gá năäho Yôesigí' naví ûnp'oe donts'ancha'khây máadân, naví wówátsi dáypăkhây máa, ihaydiho naná năä oepáa k'aydidi dáyyâa'amídí. 7 Wí tsaa'i háa wí ää'i hânho isó'dinde waagibá naa wá' dáysó'dêe Yôesiví híwó'di t'ôe dôn'amídí, hedá háa díyôn waagá dônbowa, hedá i hăăwí ívíwhâyunde'i-á dó'áyîngi'an. 8 Hediho in to'wên díví'äädedi páadé dipówá'in wí hăăwí dit'anpo' waabá, naa wá' hăăwí naagí' dînte'kw'ódi'i' donkekhây máa, gá naví wówátsi ta'ge donhondân. Na'inbí Sedó Jesus-á namuu i to'wí t'owa ta'ge ovâytukankhây máa'i háa híwó' háa híwó'pí díví'annin, hedi idáho nă'i dînte'kw'ódi'i' naa dímmăáni, hewänbo naada'ba yoe, in wé'ge'in t'owa pín ta'ge haydi óetsíkha'máa'in nawáy'ää-ídi, innân wá' hanbá ovâymmăáni.

Wên t'owaví'gedi Paul ita'nan

9 Bisó'dêe-í hanwaapídíbo naví'piye' un'ää-ídi. 10 Demas-didáho díyoe'an, i-á nă'i oepáa k'aydiwi hăăwí shánkí iséegídího', hediho oe Thessalonica búu'úpiye' namää. Crescens-á oe Galatia nangepiyá namää, hedá Titus-á oe Dalmatia nangepiyá. 11 Năä-á Luke-da'mân naa-ádi na'ân. Mark-á năamá'í, i-á ûnkoedi naví t'ôe iwe díkhăge'namí'in. 12 Tychicus-á oe Ephesus búu'úpiye' dósan. 13 Hedi un'ädi naví k'éwé'in aa oe Troas búu'ú Carpus-ví'we donyoe'annin dînmá'í, hedá naví ta'di-á wá' dînmá'í, hewänbo shánkídá i púye eedi nata'muu'i ta'di-á.

¹⁴ Alexander i kwäk'udì ihäwípa'idá naa báyéki díyanäki'an, hedího i híwó'pí' dí'andi namuudi Na'inbí Sedódáho báyéki óetuchänukhâymaa. ¹⁵ U-áho hä'i senbí'wedí ó'áyíngi'an, i-á na'inbí hí' t'aygidi iyoe'gí'andi.

¹⁶ Páadé naa dítuýó'diwekándí naa wí'bo dáy'aywoenídí dáyhée'an dihaydi tóebo wí'iwínúpi naa díkhäge'namídí. T'ähkídíbo díyoe'an. Naa oda' Yóesidi ovây'owóyé-í'in tobá han díví'an wänbo'. ¹⁷ Hewänbo Na'inbí Sedó-á naa-ádí nayidi idän díkhäge'nan, hedá in kay-á dímägi t'ähki iví tuu t'owa dovây't'óe'amídí, hedího t'ähki in Hudíyo dimuupí'in iwe diyí'in dit'oe. Hedí Yóesidi naa dín'aywon, wí to'wí wí khänbí wäá iwedi óewhahké' waabá naa dí'an. ¹⁸ Hedí Na'inbí Sedódáho t'ähki i híwó'pí' t'owadi díkhâymaa'in dida' iwedi díwhahkéyí, hedá idá oe makówá wáy i natsonnän diwepiye' bahpíbo díhúuwí. Hänhay wänbo t'ähki t'owa dínkhây'ä' kw'áayébo' óemá've-í'in. Hamân.

Wí sengituu namuu'i'

¹⁹ Priscilla-á Aquila-á ovänsengitu'âamí, hedá in Onesiphorus-ví k'aygiwindá wá'. ²⁰ Erastus-á oe Corinth búu'úbo iwóyí', hedí Trophimus-á nahaydi oe Miletus búu'ú iwá dóyoe'an. ²¹ Bisó'dée-í wa'di nate'núpóepídíbo' unpówá-ídí. Eubulus-dá wóesengitu'an, hedá Pudens-dá Linus-dá, Claudia-dá, hedá t'ähki in wé'ge'in tí'úuwín páadé'indá inbí sengituu wónsan.

²² Na'inbí Sedó Jesus uví pí'ná khó'yé mänmä've-í, hedá iví séegísehkanä-á wóemääní.

Naʼinbí Sedó Yôesiví Tʷʷ / Nanbí Sedó Jôesiví Tun

New Testament in Tewa (USA) (San Juan/Santa Clara)

copyright © 2012 Wycliffe Bible Translators, Inc.

Language: Tewa

Translation by: Wycliffe Bible Translators

Contributor: Wycliffe Bible Translators, Inc.

Naʼinbí Sedó Yôesiví Tʷʷ (San Juan)/ Nanbí Sedó Jôesiví Tun (Santa Clara)

Copyright Information

© 2012, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tewa (USA)

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 11 Nov 2022 from source files dated 29 Jan 2022

f775bf1b-8c8a-5c5e-9288-3b9b00387997